

Na a No-Billag – na ad in Grischun senza vusch

Il comité dal Grischun triling «Nein zu Graubünden ohne Stimme/Na ad in Grischun senza vusch/No a un Grigioni senza voce» sa preschenta

DA MARTIN CABALZAR

■ Il co-presidi dal comité grischun «Na a No-Billag/Na ad in Grischun senza vusch» taxescha l'iniziativa da «No-Billag» sco attatga radicala e privlusa sin las medias independentas e sin la democrazia directa. Al comité appartegnan tant personalitads da la pcd, pbd, pld e ps, dentant era tals da la pps e dals verd-liberals. Els averteschan che l'approvaziun da l'iniziativa muntassia la fin per la purschida trilingua da radio e televisiun or dal Grischun e che la cultura indigena patessia sensibilmain da las consequenzas da questa iniziativa zunt radicala.

In'iniziativa privlusa e radicala

«L'iniziativa che vegn en votaziun ils 4 da mars 2018 è ina da las pli privlusas e radicalas iniziativas dals decennis passads», punctuescha cusseglier naziunal *Martin Candinas* (pcd). La No-Billag vul abolir tut las taxas da recepziun da radio e televisiun e vul cementar en la Constituziun federala in scumond da financiar radio e televisiun cun daners publics. Tras quai perdessia la SSR 75 pertschient da sias entradas. «Pertutgadas fissan dentant era las 34 staziuns regionalas da radio e televisiun che vegnan medemamain finanziadas cun 70 pertschient cun taxas. Er ellas stuessan sistir lur programs e lur emissiuns sche l'iniziativa vegniss acceptada», declera cusseglier dals chantuns *Martin Schmid* (pld). Quai fissia in tagl radical per la cuntrada da medias svizra. Tenor Candinas na datti betg in plan B, pertege praticamain naginas emissiuns possian vegnir refinanziadas senza taxas. Tar in gea a l'iniziativa na desia nagina chasa da medias publica en servetsch da la publicitad. La Svizra fissia il sulet pajais en Europa che renunziassia voluntarmain ad ina instituziun sumeglianta. Tenor Schmid na portia l'iniziativa No-Billag betg ina evoluziun da la cuntrada



Gist dal Grischun triling cun sias minoritads rumantschas e talianas che patessan il pli fitg da las consequenzas da l'iniziativa spetgan ils adversaris in vigurus na a No-Billag.

FOTO O. ITEM

mediala, mabain ina revoluziun. I saja tuttavia giustifitgà da manar ina discussiun davart il cuntegn dal servis public da la SRG, dentant betg davart sia aboliziun, punctuecha Schmid. I dovria ina debatta ordinada senza far adiever dal mogn sco quai che l'iniziativa intendia. La SRG gioghia in'impurtanta rolla per la coesiun naziunala e per la chapientscha vicendai-vla tranter las regiuns linguisticas.

Attatga sin las medias independentas e sin la democrazia directa

La democrazia pretenda ina vasta infurmaziun. Per il cusseglier dals chantuns *Stefan Engler* da la pcd èsi perquai cler: «Nus

duvrain ina vasta purschida d'infurmaziun ed uschia la SRG SSR per che la democrazia possa funcziunar.» Per il comité è l'iniziativa No-Billag consequentmain in'attatga frontala sin las medias independentas e sin la democrazia directa. Plinavant vegnia la cultura independenta a patir pervi da la perdita da la promozion dal film e dal chant e da la musica dal Grischun. Era la solidaritad tranter las regiuns linguisticas saja periclitada. Il Grischun retschaivia sur la gulivaziun da las taxas meds finansials per pudair producir ses programs da radio e televisiun cun novi-

tads localas e cun reportaschas spezialas davart la cultura grischuna.

Tenor Engler enserra l'iniziativa in'intenziun da desolidaritad che demaschiescha ses aderents sco adversaris fundamentals da la democrazia directa. El spera che tant il Grischun sco il Tessin mettian in vigurus na a l'urna. Pli clera che la maioritad dals na saja e pli ferma che la posiziun dad RTR e dad RSI saja.

Il Grischun perda sia purschida da medias e numerus posts da lavur

«Mo ina ferma SRG cun ina finanziaziun garantida sa resguardar commensurada-

main las regiuns muntagnardas e periferas», accentuescha la cussegliera naziunala socialdemocratica *Silva Semadeni*. Il Grischun perdessia tar in gea a l'iniziativa No-Billag ses emetturs regionalas da la SRG, SRF, RSI ed RTR, dentant er ils emetturs privats RSO e TSO en lur furma actuala. Plinavant sajan passa 240 posts da lavur periclitads directamain. Ils emetturs da radio e televisiun actuals rapportian directamain or dal Grischun davart actualitads, cultura e sport e quai er en las linguas minoritaras rumantsch e talian. Gist per il rumantsch saja quai da muntada centrala per la tgira ed il svilup da la lingua. Ins stoppia stgaffir adina novs peds che stoppian vegnir derasads sur las medias. La gulivaziun da finanzas pussibiliteschia ina solidaritad tipica per la Svizra envers las minoritads.

Per il cusseglier naziunal burgais-democrat *Duri Campell* èsi cler: «Il martgà na funcziuna betg en il Grischun. La gronda part da las reportaschas actualas na dessi betg pli.» En il sector da radio e televisiun sajan sulet emissiuns da sport, divertiment ed erotica lucrativas. Gist las emissiuns da sport regional sajan ina motivaziun impurtanta per la giuventetgna d'insomma far sez sport. Era saja la reclama indirecta che transmissiuns da sport or da noss chantun effectueschan betg da sutvalitar, manaja Campell.

El appellescha plinavant da dar al nov president, al nov directur ed a la nova vice-directura (*Ladina Heimgartner*) la schanza da realisar lur strategia.

Impedir in Grischun senza vusch

En scadin cas giaja per impedir in Grischun senza vusch, punctuescha il co-presidi unisono. Il comité appellescha perquai a tut las Grischunas ed a tut ils Grischuns da far adiever da lur dretg da vuschar ed uschia gidar a cumbatter l'attatga sin la cuntrada mediala da questa iniziativa radicala.